




藝文序

孔子曰言之無文行之不遠文之不可以已也如是顧自科學萌芽事求實徵不務空談競病俳儷之文已被淘汰蘇東坡云以文字言策論爲有用詩賦爲無益以政事言策論詩賦皆無益也由是以談詩文被淘汰亦固其所雖然山水清音之悅耳奇花異草之悅目何害造物之生成簫韶奏而庶尹諸干羽舞而有苗格適成帝王之大化詩文之陶冶性情怡養精神則悅耳之音悅目之色也播諸樂歌潤色昇平則依永和聲之遺也顧可盡廢乎哉茲錄文之有關風化者而流連光景之辭亦間有採撫非闢靡也攻木攻金甄埴而外必有設色之工之意也故以藝文殿焉



碑文序文

蒙荒舊壤古時之石刻已莫能得即有之亦漫漶而不可辨識幾無可志之文矣然創始之經營紀載賢能之功德頌揚碑刻亦頗不尠至序文爲開宗明義之用凡籌款任人內容外助各事項莫不詳爲陳述以昭示來茲搜而輯之旣以明不忘前功更可動後人觀感焉

勅建海公祠碑記

余司訓開原十餘年矣凡宰斯邑者無不同寅協恭和衷共濟而獨仙洲海公交契最久深悉其爲人公姓納喇氏名海盛福建駐防滿洲正白旗人道光己亥科舉人咸豐己未揀發奉天以知縣候補海疆防堵監造田莊臺北岸礮臺保薦加知州銜辛酉三月署復州事勵精圖治間刑清士商愛戴稱之曰海青天壬戌三月卸任九月來署開原時訟案紛積自爲批判不專倚幕賓察吏役尤嚴商民畏服獻公正廉明匾額每聞賊至即親率勇役往禦爲武弁士卒先甲子九月去開原乙丑秋帶兵

緝捕東山一帶賊匪招降賊黨多名旋調署昌圖廳同知遂歿於王事

盛京將軍據實入奏十二月初十日奉

上諭恩合等奏賊匪回竄法庫擾及昌圖廳戕官劫獄一摺據奏匪首周榮姜三疙疸等率領股匪竄至昌圖所屬之金家屯經署同知海盛調集練勇接仗失利該匪遂擾及昌圖焚署劫獄覽奏實深焦恨其勦賊陣亡之署昌圖廳同知候補知縣海盛着交部從優議卹以慰忠魂欽此同治五年五月科爾沁親王伯奏查前署昌圖廳同知海盛自四年十一月接任未及兼旬即值賊匪猖獗二十四日探有大股賊匪馬傻子等三千餘人由法庫門東竄該員一得警信即親率丁役星夜馳往金家屯調集兵勇扼要堵擊次日與賊鏖戰多時互有殺傷旋因多寡不敵被賊圍困身受多傷兵勇潰散猶復手刃悍賊力竭陣亡其死難情形盛京將軍業已具奏茲因督兵邊外往返該處詢訪耆民莫不異口同聲嘖嘖稱頌似此疾風勁草大節凜然正擬彰善闡幽奏請旌卹茲據署昌圖廳同知高椿轉據合屬紳民監生楊九成貢

生妻永曜等公同具呈以海盛爲民捍患禦賊捐軀忠烈性成洵堪敬仰現擬建立專祠以便歲時瞻拜懇請具奏前來復查該紳民等懇請建祠修祭實爲大義所感出於至誠爲此附片陳奏六月初三日奉

上諭前據恩合等奏昌圖廳被匪竄擾署同知海盛禦賊被害業經降旨交部議卹茲據伯彥諾謨奏稽該故員歷署州縣潔已奉公循聲卓著在昌圖任內爲民捍患勦匪陣亡大節凜然據該處紳民懇請建立專祠等語着照所請准其在死事地點捐建海盛專祠以順輿情而彰忠烈欽此欽遵於同治六年經現署昌圖廳同知杜芷軒刺史轉飭該廳紳民等捐資在金家屯死事地方建立海公專祠附於祀典中春秋致祭茲當祠宇告成以余與海公交誼深厚索碑記於余惟蕪詞樸陋何敢以不文辭謹撮其崖畧刊於豐碑俾後之登堂瞻拜者得識爲捍民禦賊捐軀之顛末焉

勅授文林郎奉天開原縣學訓導截取知縣加三級天津華長卿撰誥授奉政大夫署昌圖撫民同知升用知州加三級通判杜芬書丹

大清同治歲次丁卯巧月穀旦敬立

紳商民等建立海公詞碑記

蓋聞孔曰成仁孟曰取義惟其義盡所以仁至是人全乎仁義而死者且不朽焉慨自馬賊之起也始聚山林繼擾邊境所過城池虜掠一空賊氛日熾亦幾幾乎不可撲滅矣而我海公乃適當其衝焉海公閩人也名舉孝廉身登仕版蒞任昌圖矢志安靜會立團練惟期掃蕩妖氛器備戈矛務欲奠安黎庶自同治四年十一月二十五日聞賊猝至冒險而來泣血誓師不憚背城一戰尅期滅賊無異渡河三呼不意烏合之衆蜂擁而來我軍不利賊勢愈張海公捐軀報國赴難者三百人舍身爲民哀慕者五十社也大節無虧張睢陽之貞操於今未泯忠心不二顏常山之烈跡振古如新及夫天兵向東賊人敗北跳梁小醜盡爲棄甲拋戈明府芳名不愧青天白日綸音下逮建立專祠國家既有旌表之恩我商民豈無愛戴之念所以刻碑勒名以表我公之爲國爲民立名立節俾後之覽斯碑者有以知我公之節義云

大清同治歲次戊辰桂月穀旦敬立

昌圖建修文廟碑記

碑立於孔廟櫺星門東

誥授朝儀大夫昌圖邊防撫民同知張鼎鏞撰

敕授修職郎昌圖廳訓導許善昌書並篆額

昔文翁治蜀創建學宮而聖人之祀隆千古梁武帝詔郡縣立學校而聖人之祀徧天下誠以自天子以至庶人莫不學故自京師以至下邑皆有教此聖賢廟祀所以與社稷並崇而無或闕如焉然其創學建廟要皆在興圖版籍中服教從風或遲至百年數世後從未有遠逾荒服越在邊隅社稷未立而學校先興者有之自昌圖始昌圖故蒙古游牧地素鮮居民奚論文教自嘉道間招佃開荒振興農業而後野有煙火家自忠親王居城肄業供奉文昌而後人知俎豆事厥後生齒日繁絃誦競作有寄籍擢高科者有釋褐登仕版者不數年間郁郁彬彬殆居然文物邦矣是固文明之治有感皆通要亦聖教之宏無遠弗屆也然宮墻不建則無以束人心學校未

修則無以齊民志故驅音漸改而鶴唳時聞同治四年土匪滋肆蒙我伯親王戡斧東征甫就蕩平王於勘亂之餘思爲致治之本以爲風化由教化移教化自學校始文教之興殆不可緩爰列八事上陳首以學校爲請旋得俞旨交地方大吏議覆適五年四月間昌圖寄籍生員任蘭秀等曾聯名請建學校上憲據情入告而建廟設官之命遂下時在六年秋八月也慶文治之覃敷感聖恩之下逮衆情踴躍尅日經營余於是冬奉檄分守是邦適逢盛會樂爲贊成乃督率紳商倡議捐貲鳩工庀材於城東南隅得爽塏地卜著俱吉工作遂興以署訓導張觀海撰定規條以舉人趙映辰貢生齊堯封總司局事其修造殿廡則六品銜張德先等主之其監造祭器則教習劉輝斗等主之蓋經始於丁卯冬月而落成於戊辰初秋未閱月值仲秋上丁偕訓導許善昌巡檢胡俊德率執事諸生行釋菜如禮而闔屬紳董亦於是日畢集告成功於至聖先師孔子前園橋觀禮者以千計僉謂不圖邊荒遠徼得瞻禮樂威儀於以見善教之入人甚深也禮成紳董等請記余余雖不敏然以忝列冠裳躬親

俎豆敢不喜書而樂道之故爲記其創建之由來與夫興作之顛末竊尤願同志諸君子教士者盡化導之方治民者盡董勸之責居是邦者民敦禮讓士洽絃歌行見芹藻生香萑苻默化詩書可靖戎馬俎豆遂化干戈以仰答聖朝教育之隆賢王栽培之厚豈不懿歟豈不休歟是爲記

同治七年歲次戊辰秋八月中澣吉日立

學署教條

朝廷建立學校選取生員免其丁糧厚以廩膳設學院學道學官以教之各衙門以禮相待全爲養成賢才以供

朝廷之用諸生皆當上報

國恩下立人品所有教條開列於後

- 一、生員之家父母賢智者子當受教父母愚魯或爲非者子旣讀書明理當再三懇告使父母不陷於危亡

一、生員立志當學爲忠臣清官書史所載忠清事蹟務須互相講究凡利國愛民之事更宜留心

二、生員居心忠厚正直讀書方有實用出任必作良吏若心術邪刻讀書必無成就爲官必取禍患行害人之事者往往自殺其身當宜思省

三、生員不可干求官長交結勢要希圖進身若果心善德全上天鑒佑必加以福

四、生員當愛身忍性凡有司官衙門不可輕入即有切己之事止許家人代告不許干預他人詞訟他人亦不許牽連生員作證

五、爲學當尊敬先生若講說皆須誠心聽受如未明者從容再問毋妄行辨難爲師長者亦當盡心教誨毋致怠惰

六、軍民一切利病不許生員上書陳言如有一言建白以違制論黜革治罪

七、生員不許糾黨多人立盟結社把持官府武斷鄉曲所作文字不許妄行刊

刻違者聽提調官治罪

同治八年四月吉日鐫

昌圖文廟續記

碑立於孔廟櫺星門西邊

勅授修職郎昌圖廳訓導許善昌撰

賜進士出身誥授奉政大夫直隸高陽縣知縣趙映辰書

昌圖文廟落成於戊辰秋七月也其創造之艱與夫興作之盛前記具詳無庸贅叙矣數載以來余獨於感應之理竊有默會焉蓋余自七年六月司訓來茲時值廟工將畢預約於仲秋釋菜上告成功余適逢盛會兼督收工敬謹履勘計建造正殿三楹東西廡各五楹殿後爲崇聖祠規模與正殿同前爲大成門東西有掖門通書院學署又前爲櫺星門最前爲戟門泮池在其中門外則宮牆蔽其前左右爲禮門義路下馬碑在焉典制具備無或闕如至日官紳畢至士民咸集大啓賓筵同深慶賀僉云工程完備可以告竣矣獨貢生齊君堯封曰否否以爲文廟據形勝之地其勢

愈崇則其效愈速擬在東南陬添建魁星閣以符星家言衆以所費不貲甚難其請齊君謀於廳尊及余欲獨任其事廳尊及余壯其志共推許焉遂即購材興工并出其家藏巨木刻爲神像不兩月而工亦竣所謂有志者事竟成也然齊君之爲此非爲一己計爲闔屬計也非爲科名謀爲轉移氣數謀也乃次年齊君之紉子與督工紳士張君德先之孫相繼入泮宮至辛未科趙君映辰成進士壬申則榮生文達中拔萃科即寄居書院之王君善啓及恭錄神牌之趙君祖昌張君露恩亦同膺選拔繼此則魏生晉楨聯捷成進士婁生逢甲則與李生遇春同貢成均婁生隨登鄉舉吳生錫侯則以國學生中武鄉榜五六年來文武科第絡繹連茹抑何盛歟然則天所福與人之所由興固昭昭若是也感應之理顧可忽諸推是理也科名於此盛風化於此移而氣數即於此轉將見犢悍之風化而爲禮讓之俗戎馬之地變而爲絃誦之鄉官斯土居斯邦者倘共相勸勉以底於上理是又不獨齊君一人之力實昌圖闔屬之福而氣數轉移之機也余故幸夫感應之理甚神而形勝之言有驗也謹

爲是記

同治十三年歲次甲戌秋七月中澣吉日

昌圖開文書院記

碑立於書院門東旁

將欲郡之學者盡其學問思辨之功篤其孝弟忠信之行修之家而鄉里有所矜式
獻之廷而朝廟資其贊襄則必使其萃於一堂習其常業聽名師之指授資賢友之
琢磨而後有以成其材收其效此書院之設所由重也我國家崇尚儒術培植人材
既取民之秀者升之於學復頒帑金於各省會建設書院以廣造就而府廳州縣承
流宣化亦各以捐建書院爲當務之急蓋二百餘年矣四海之內學校如林文運日
興郁郁乎其極盛哉昌郡爲邊外蒙藩之地客民寄居知學者少自同治七年仰荷
恩諭創立學宮而嚮學者日衆因材施教信非二三司鐸所能徧及余於丙戌夏攝
篆是邦竊以勸學爲志訪郡之開文書院爲張芷生司馬所創建趙聘之增芝圃徐
季賢三太守又續爲集款計得市錢六萬緡發商生息以備書院歲脩與諸生脩脯

膏火之需雖延師課士未及舉行而規模固略具矣當以舉行書院諸條稟之大憲
並以撥款爲請均蒙報可復捐廉倡率俾郡之尙義者廣爲集腋合之舊款共得市
錢十萬緡並發各商計月生息而書院經費於是乎不慮其不足素知浚川陸寶臣
主政學有本原講求實踐爰馳函延請主茲講席立肄業之條規定餼廩之等差按
旬考課分日講貫而劉古齋張曉岩兩司鐸楊瀚秋錢澤遠兩司理復先後贊成之
兩載以來及門生徒奮然興起相觀而善者良不乏人戊子春寶臣主政赴都共職
荐其同邑朱子襄孝廉以自代循用舊章誘掖獎勵俾從學各士得以黽勉策勵不
棄前功由此而自強不息日新月異造就詎可量乎竊謂求學之道亦在求已而已
得之於心始爲真知見之於事始爲實行近而施及一鄉遠而達之天下亦祇盡其
當爲完其本性其於求已之外有所增益哉所望有志之士窮經稽古返之身心求
爲有本之學勿爲歧途所惑外物所搖而守茲土者崇真儒黜僞士日以扶持正學
爲急務將見英敏俊乂之流明體達用超然傑出而椎魯之質亦皆循循規矩不失

爲謹飭之士庶幾移風易俗使邊塞之民咸知禮讓而出而問世者即以素所得爲報國之資仰副聖天子求賢養士之至意則求已之效於是乎著而書院講學之功爲不虛矣余恐其久而廢墜也略述其事之始末及所以期望多士之意而爲之記其捐資姓氏與生息數目並勒諸石俾後之君子有所考焉

賜同進士出身花翎運使銜署昌圖府事試用知府高同善撰

壬午科舉人掌教開文書院凌川朱襄廷書

光緒十四年三月穀旦

石工莫春榮鐫字

修建昌圖開文書院碑記

碑立魁星閣下

昌圖居北徼外爲古肅慎邑婁地今爲蒙古游牧所嗣以民徙此者日以衆乃設學校立書院絃誦琅然彬彬有儒者風焉宦與紳培植之力良足多矣歲壬辰今太守錢公來典郡慨然以振興文教爲己責觀生徒日以益增乃允集貲改東西廂各七舍爲東西向南各三所每所各三間共爲齋舍十八間先後捐廉二百金錢千緡以

濟公費之不足士林咸感誦之今年春郡人士復以未竟之工請太守允其議乃出公款三千緡有奇於道義門外增建東西房各三間大門三楹廊下樹碑四外啓門一而書院之規模備形家說謂今歲秋試定利文明云工垂成諸生屬余記其事余惟書院者儲才之數也人才之教育品爲先學次之夫人知之矣時局孔艱朝廷求才方汲汲近復允臣工請令各書院講經史習掌故及測算格致有裨時事諸生業此果不囿於一孔之見視帖括外皆僻書精研古籍自知今之所謂時務者胥不外群經全史諸子百家焉昌圖文運方蒸蒸日上矧承太守之作育士皆爭自奮勵知必有明體達用爲吾道之藩籬且作國家之屏翰者正非欲高閑闕美輪奐耀一時之觀瞻而已也

昌圖府教授朱勳成撰文

昌圖府教習陳鼎新書丹

大清光緒二十三年四月穀旦

石工莫春榮鐫字